

慶成宮 在打貓街內，奉祀天上聖母。坐東向西。嘉慶十四年間衆街居民公置（每年三月廿三日，衆街演戲祝壽誕）。

陳聖王廟 在打貓街內，坐北向南，咸豐六年，衆街民人公置（每年二月十五日演戲，係衆街公建祝壽誕）。

福德廟 在打貓街內，坐西向東。

### 番社

乾隆年間，有生番歸順潘姓，在打貓街西門外爲社，約有一百餘戶。番俗與民居不同。每年二月十二日，通社番男女飲酒爲樂，衆番皆高聲咻叫，連飲三天，咻叫三天。至十五日，全社番男女起步奔走，曰走社。婚姻之事，將社內未娶番男若干人，候齊奔走，至番仔橋頭爲限，以先到者爲捷，以未嫁番女若干人依次論配。無訂盟完聘之禮。臨喪則將死屍扶出庭中，群番歌舞爲戲，以贈死者。既畢，哭泣悲哀，將葬之日，視家貧富，分一半物業爲葬費。至今死亡者甚多。尙伸（？）十外戶而已。舊俗革除，雜處民間，與平民無異。惟番女無纏足，以烏布蒙頭，特少異耳。

### 出仕文官